

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov>

HARI ISNIN, 14 NOVEMBER 2016, PUKUL 10.00 PAGI

Bil. 46

PERTANYAAN-PERTANYAAN BAGI JAWAB LISAN

1. PR-1343-L76924
Dato' Noraini binti Ahmad [Parit Sulong] minta **MENTERI PENDIDIKAN** menyatakan adakah pembantu guru telah dilaksanakan di semua sekolah di seluruh negara dan jika belum, bilakah pelaksanaan ataupun pelantikan pembantu guru akan bermula bagi mengurangkan bebanan tugas guru masa sekarang.
2. PR-1343-L77097
Dato' Seri Mohamed Azmin bin Ali [Gombak] minta **MENTERI LUAR NEGERI** menyatakan apakah pendirian Kerajaan terhadap Konvensyen Berkaitan Pelarian 1951 di bawah Pertubuhan Bangsa-Bangsa Bersatu.
3. PR-1343-L75986
Dato' Haji Mohd Zaim bin Abu Hasan [Parit] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah terdapat usaha untuk mengurangkan bilangan gelandangan dengan memberikan pekerjaan di sektor pertanian khususnya dengan menggunakan tanah-tanah terbiar di kawasan luar bandar.
4. PR-1343-L76939
Tuan V. Sivakumar [Batu Gajah] minta **MENTERI KEWANGAN** menyatakan keberkesanan Agensi Kaunseling dan Pengurusan Kredit (AKPK) dalam menangani masalah peminjam yang tidak mampu membayar balik pinjamannya. Nyatakan jumlah pelanggan yang cuba mendapatkan khidmat nasihat AKPK dan jumlah kes yang diselesaikan oleh agensi itu dalam tempoh 5 tahun.
5. PR-1343-L77158
Dato' Ir. Haji Nawawi bin Ahmad [Langkawi] minta **MENTERI SAINS, TEKNOLOGI DAN INOVASI** menyatakan adakah pihak Kementerian menjalankan penyelidikan terbaru yang dapat membantu golongan petani dalam menghasilkan tanaman hibrid baru ataupun tanaman mutan yang dapat membantu golongan tersebut terus menjana pendapatan walaupun keadaan cuaca yang tidak menentu yang dialami di Negara kita pada masa kini.

6. PR-1343-L76415
Puan Siti Zailah binti Mohd Yusoff [Rantau Panjang] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik terkini kadar penceraian di Malaysia untuk tahun 2014, 2015 dan 2016 mengikut negeri dan bangsa serta cadangan mengatasinya.
7. PR-1343-L75924
Datuk Mohd Fasiah bin Haji Mohd Fakeh [Sabak Bernam] minta **MENTERI KESIHATAN** menyatakan setakat manakah liputan perlaksanaan Program Immunisasi Kebangsaan (NIP) dan nyatakan bilangan kes penolakan oleh ibu bapa atau penjaga bagi membenarkan anak mereka diberi imunisasi serta nyatakan sejauh manakah ianya telah memberi kesan kepada menyebabkan timbul kembali dan peningkatan penyakit yang boleh dicegah dengan vaksin seperti Difteria, Polio, Measles (campak), Pertutis (Batuk kokol) dan Tibi (*tuberculosis*) yang boleh menyebabkan kematian.
8. PR-1343-L76728
Dato' Abdullah Sani bin Abdul Hamid [Kuala Langat] minta **MENTERI SUMBER MANUSIA** menyatakan tindakan pindaan Akta Kerja 1955.
9. PR-1343-L76059
Dr. Ismail bin Daut [Merbok] minta **PERDANA MENTERI** menyatakan jumlah penumpang dan jadual perkhidmatan KTM ETS antara bandar mengikut destinasi dan sejauh manakah perkhidmatan ini benar-benar mampu mengurangkan kebergantungan pengangkutan awam darat lain seperti bas, teksi dan sebagainya.
10. PR-1343-L76283
Dr. Haji Izani bin Haji Husin [Pengkalan Chepa] minta **MENTERI KESIHATAN** menyatakan apakah penyelesaian Kerajaan dalam menangani masalah kekurangan doktor pakar khususnya bagi kawasan luar bandar.
11. PR-1343-L76618
Tuan Haji Hasbi bin Haji Habibollah [Limbang] minta **MENTERI KEWANGAN** menyatakan apakah penyebab penyusutan nilai Ringgit Malaysia dan apakah langkah-langkah Kerajaan untuk menaikkan nilai Ringgit Malaysia.
12. PR-1343-L76120
Tuan Wong Tien Fatt @ Wong Nyuk Foh [Sandakan] minta **PERDANA MENTERI** menyatakan sama ada Kerajaan Malaysia sedar bahawa kemudahan-kemudahan teknologi seperti Radar masih berkurangan kerana memandangkan AIS yang kini dipasang di kapal-kapal negara kita yang tidak mencukupi bagi menjamin keberkesanan pertahanan di ESSCOM.
13. PR-1343-L77022
Datuk Liang Teck Meng [Simpang Renggam] minta **MENTERI PERUSAHAAN PERLADANGAN DAN KOMODITI** menyatakan langkah yang diambil oleh kementerian dalam membantu meningkatkan harga komoditi getah dalam pasaran. Nyatakan juga sokongan Kementerian kepada peniaga getah runcit dalam menghadapi penurunan harga.

14. PR-1343-L76010
Tuan Wong Chen [Kelana Jaya] minta **MENTERI KEWANGAN** menyatakan jumlah aset bukan kewangan milik Kerajaan negara, termasuk tetapi tidak terhad kepada harta benda, pada 31 Disember 2015.
15. PR-1343-L75863
Datuk Abd Rahim bin Bakri [Kudat] minta **MENTERI PENDIDIKAN** menyatakan bilakah pembinaan SMK Kanibongan dapat disiapkan memandangkan projek ini sudah terlalu lama tergendala dan progres pembinaannya terlalu perlahan dan apakah punca kelewatan ini.
16. PR-1343-L75657
Tuan Chua Tian Chang @ Tian Chua [Batu] minta **MENTERI KEMAJUAN LUAR BANDAR DAN WILAYAH** menyatakan apakah status terkini perlaksanaan Dasar Pemberian Milik Tanah Orang Asli (DPPTOA). Adakah DPPTOA ini akan diteruskan atau tidak. Adakah sebarang pindaan telah atau akan dilakukan. Jika ya, adakah Orang Asli akar umbi dibawa berunding.
17. PR-1343-L76798
Dr. Mansor bin Abd Rahman [Sik] minta **MENTERI PERDAGANGAN ANTARABANGSA DAN INDUSTRI** menyatakan status terkini TPPA selepas termeterinya perjanjian tersebut pada bulan Februari 2016.
18. PR-1343-L76210
Tuan Nga Kor Ming [Taiping] minta **MENTERI KEWANGAN** menyatakan apakah tindakan dan rancangan Kerajaan untuk memulihkan mata wang Ringgit yang nilainya telah merosot secara ketara sehingga ia menjadi mata wang yang mengalami kejatuhan paling teruk di Asia sejak 2014.
19. PR-1343-L75635
Datuk Dr. Haji Abd. Latiff bin Haji Ahmad [Mersing] minta **MENTERI KEMAJUAN LUAR BANDAR DAN WILAYAH** menyatakan Kementerian ini melalui MARA telah melaksanakan program pusat sehenti bagi pengusaha telekomunikasi (IT) di pusat membeli belah seperti di Sungai Wang Plaza:-
- (a) berapakah kos pelaburan yang dibelanjakan oleh Kementerian; dan
 - (b) apakah pulangan yang diperolehi dari pelaburan tersebut.
20. PR-1343-L76248
Tuan Idris bin Haji Ahmad [Bukit Gantang] minta **MENTERI PERTAHANAN** menyatakan bilangan anggota tentera yang tidak berpencen, apakah usaha yang dilakukan untuk membela kebajikan mereka dan adakah Kerajaan bercadang untuk memberi “one off” RM1000 setiap tahun sebagai mengenang jasa mereka kepada negara.
21. PR-1343-L75599
Datuk Linda Tsen Thau Lin [Batu Sapi] minta **MENTERI KEWANGAN** menyatakan bila Pusat Transformasi Bandar akan dibina di Sandakan.

22. PR-1343-L75751
Tuan William Leong Jee Keen [Selayang] minta **MENTERI DALAM NEGERI** menyatakan jumlah serangan dan sasaran oleh ISIS dan kumpulan pengganas lain di Malaysia sejak 2013, tindakan yang diambil untuk mencegah perbuatan ganas dan menghalang rakyat Malaysia yang menyertai kumpulan pengganas.
23. PR-1343-L75939
Dato' Sri Dr. Haji Irmohizam bin Haji Ibrahim [Kuala Selangor] minta **MENTERI PENDIDIKAN** menyatakan adakah Kementerian berhasrat untuk meneruskan sistem pembelajaran j-QAF ini di sekolah-sekolah menengah di seluruh negara.
24. PR-1343-L77131
Dato' Mohd Ariff Sabri bin Abdul Aziz [Raub] minta **MENTERI PERTANIAN DAN INDUSTRI ASAS TANI** menyatakan :-
- (a) pengembangan *eco-agriculture* berikutan beberapa ekonomi besar sedang meningkatkan pelaburan dalam bidang *eco-agriculture*, terutama makanan, adakah pihak Kementerian bercadang meningkatkan pelaburan dalam bidang ini; dan
 - (b) sila nyatakan produk yang dibangunkan di bawah *eco-agriculture*.
25. PR-1343-L75550
Tuan Budiman bin Mohd. Zohdi [Sungai Besar] minta **MENTERI PELANCONGAN DAN KEBUDAYAAN** menyatakan tindakan lanjut Kementerian bagi mengekang tindakan sesetengah pengusaha rumah sewa yang menggunakan terma *homestay* bagi menarik pelanggan sehingga memberi gambaran yang salah terhadap terma *homestay* itu sendiri.
26. PR-1343-L76605
Tan Sri Dato' Seri Abd Khalid bin Ibrahim [Bandar Tun Razak] minta **MENTERI KESIHATAN** menyatakan senarai strain baharu bagi penyakit masih berleluasa dan yang muncul semula (setelah dibasmi) serta penyakit baharu seperti Zika di Malaysia serta sumber yang digembleng seperti perbelanjaan Kerajaan Persekutuan dan bilangan staf untuk menentang strain dan penyakit baharu antara 2000-2015.
27. PR-1343-L77210
Tuan Anuar bin Abd. Manap [Sekijang] minta **MENTERI PERTANIAN DAN INDUSTRI ASAS TANI** menyatakan sejauh manakah kebenaran laporan yang dikeluarkan Institut Penyelidikan Khazanah (KRI) yang menunjukkan bahawa Malaysia tidak mampu mengeluarkan makanan yang mencukupi dan apakah usaha kementerian bagi memastikan bekalan makanan negara tidak menghadapi apa-apa masalah pada masa hadapan.

28. PR-1343-L76310
Tuan Nik Mohamad Abduh bin Nik Abdul Aziz [Pasir Mas] minta **MENTERI PENGANGKUTAN** menyatakan langkah mengurangkan risiko kemalangan jalan raya setelah rekod daripada World Health Organisation (WHO) pada 2014 meletakkan rekod kadar kematian akibat kemalangan jalan raya di Malaysia pada kedudukan ke-34 daripada 172 buah negara.
29. PR-1343-L76817
Dato' Sri Douglas Uggah Embas [Betong] minta **MENTERI PERUSAHAAN PERLADANGAN DAN KOMODITI** menyatakan :-
- (a) apakah strategi-strategi Kementerian bagi mengawal kejatuhan berterusan harga lada; dan
 - (b) apakah usaha dan bantuan seperti *Social Safety Net* yang akan membantu pekebun kecil semasa kejatuhan harga komoditi lada.
30. PR-1343-L76688
Tuan Lim Guan Eng [Bagan] minta **MENTERI PENGANGKUTAN** menyatakan adakah dan bilakah Prasarana Malaysia Bhd. akan mengambilalih perkhidmatan feri Pulau Pinang. Apakah inisiatif yang diambil bagi mengurangkan kerugian tahunan, menambah bilangan feri, menaikkan taraf perkhidmatan yang kurang memuaskan, kekurangan kekerapan trip dan jadual tempoh operasi harian yang kian berkurangan.
31. PR-1343-L77286
Tuan Shamsul Iskandar bin Mohd Akin [Bukit Katil] minta **MENTERI PENDIDIKAN TINGGI** menyatakan apakah langkah segera yang dilakukan oleh Kementerian bagi menangani masalah pelajar bidang agama khususnya di Mesir yang tidak mendapat bantuan dan pembiayaan daripada mana-mana institusi kewangan dan agensi negeri.
32. PR-1343-L76627
Dato' Dr. Mujahid Yusof Rawa [Parit Buntar] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan :-
- (a) apakah langkah-langkah Kementerian dalam menangani hutang isi rumah yang meningkat dari tahun ke tahun; dan
 - (b) memandangkan isu rumah mampu milik dan kawalan harga yang dikenakan kepada pemaju. Harga makin melambung, ekonomi makin jatuh, maka ekuiti makin menurun. Apakah tindakan susulan Kementerian untuk mengatasi masalah tersebut.
33. PR-1343-L75892
Tuan Khoo Soo Seang [Tebrau] minta **MENTERI PELANCONGAN DAN KEBUDAYAAN** menyatakan usaha Kementerian untuk menggalakkan kemajuan dan perkembangan seni-seni Malaysia dengan bantuan para usahawan.

34. PR-1343-L75784
Dato' Sri Abdul Manan bin Ismail [Paya Besar] minta **MENTERI PENDIDIKAN TINGGI** menyatakan insentif dan anugerah tertentu kepada atlet negara yang bergelar mahasiswa universiti awam dan nyatakan jumlah terkini atlet mahasiswa yang mewakili negara di peringkat antarabangsa mengikut bidang sukan di seluruh universiti awam.
35. PR-1343-L76177
Puan Alice Lau Kiong Yieng [Lanang] minta **MENTERI DALAM NEGERI** menyatakan bilangan balai polis yang ditutup pintu pada waktu malam dan sejak bila penutupan pintu dimulakan serta apakah kesannya kepada masyarakat.
36. PR-1343-L76539
Tuan Ignatius Dorell Leiking [Penampang] minta **PERDANA MENTERI** menyatakan jumlah terperinci yang telah diperuntukan / dilaksanakan khas untuk pembangunan oleh Kerajaan Pusat kepada Daerah Penampang antara Januari 2008 hingga ke Disember 2015.
37. PR-1343-L76439
Tuan N. Surendran [Padang Serai] minta **MENTERI DALAM NEGERI** menyatakan jumlah kes tuberculosis dalam kalangan banduan-banduan penjara dan kakitangan penjara di seluruh Malaysia, dinyatakan secara berasingan, bagi tahun 2010 hingga 2016.
38. PR-1343-L77023
Raja Dato' Kamarul Bahrin Shah [Kuala Terengganu] minta **PERDANA MENTERI** menyatakan sehingga hari ini berapakah hasil kewangan di perolehi oleh telaga minyak Bertam 307 dan pecahan agihan hasil kewangannya kepada pihak-pihak yang menerima hasil tersebut.
39. PR-1343-L75615
Laksamana Pertama Mohamad Imran bin Abd Hamid (B) [Lumut] minta **MENTERI KEWANGAN** menyatakan bilakah hutang Kerajaan dapat dikurangkan sekiranya Kerajaan terus berhutang hingga mencecah RM850 billion sedangkan setiap tahun di bayar balik sekadar RM40 billion. Cara ini tidak ubah seperti mengurus hutang kad kredit yang akhirnya pemegang kad menjadi muflis. Adakah Malaysia sedang menuju ke arah itu.
40. PR-1343-L77322
Tuan Julian Tan Kok Ping [Stampin] minta **MENTERI PENGAJIAN TINGGI** menyatakan status terkini perundingan terima masuk IPTA berasaskan sijil UEC. Nyatakan secara terperinci hasil perundingan semenjak ianya dibangkitkan oleh Ketua Menteri Sarawak serta langkah-langkah positif yang telah dikenal pasti serta jangka masa yang ditentukan demi mencapai penyistiharan UEC oleh IPTA.

41. PR-1343-L75836
Datuk Juslie bin Ajirol [Libaran] minta **MENTERI PENDIDIKAN** menyatakan kawalan keselamatan di sekolah yang terdedah kepada risiko kemalangan, kes penculikan dan jenayah setempat dan berapa jumlah kes kemalangan membabitkan pelajar di seluruh negara antara tahun 2010 hingga 2016.
42. PR-1343-L77374
Dato' Normala binti Abdul Samad [Pasir Gudang] minta **MENTERI PENDIDIKAN TINGGI** menyatakan adakah pihak Kementerian bercadang untuk mengkaji semula pemberian Baucer Buku 1Malaysia kepada suatu bentuk mekanisme yang lebih berkesan berikutan keperluan untuk seseorang pelajar / mahasiswa bukanlah hanya buku semata-mata.
43. PR-1343-L77251
Datuk Rozman bin Isli [Labuan] minta **MENTERI SAINS, TEKNOLOGI DAN INOVASI** menyatakan sejauh manakah keberkesanan kempen "*cyber safe*" yang diperkenalkan oleh Kementerian dalam membendung jenayah siber yang dijangka meningkat menjelang penghujung tahun 2016 serta apakah risiko yang telah dikenal pasti tentang kekurangan tahap kesedaran jenayah siber dalam kalangan pengguna alam maya.
44. PR-1343-L75770
Tuan Fong Kui Lun [Bukit Bintang] minta **PERDANA MENTERI** menyatakan jumlah keluasan tanah Kerajaan dalam Wilayah Persekutuan Kuala Lumpur yang dijual dan dibangunkan sepanjang tempoh 3 tahun lalu, nyatakan nama pembeli, harganya dan lokasi.
45. PR-1343-L76753
Puan Nurul Izzah binti Anwar [Lembah Pantai] minta **MENTERI WILAYAH PERSEKUTUAN** menyatakan :-
- (a) laporan analisis kos dan faedah terhadap projek Taman Tugu Negara; dan
 - (b) senarai syarikat yang diberikan tender tanaman pokok-pokok Taman Tugu Negara.
46. PR-1343-L76365
Tuan Sim Chee Keong [Bukit Mertajam] minta **MENTERI DALAM NEGERI** menyatakan sama ada permohonan visa atas talian telah dikontrakkan kepada satu syarikat iaitu windowmalaysia.my. Sila nyatakan latar belakang syarikat terbabit dan bilakah kontrak bermula. Jika ada syarikat lain, sila nyatakan.
47. PR-1343-L76509
Datuk William @ Nyallau anak Badak [Lubok Antu] minta **MENTERI DALAM NEGERI** menyatakan apakah langkah serta usaha yang telah diambil oleh kerajaan dalam mengekang aktiviti militan Daesh.

48. PR-1343-L77443
Datuk Sapawi bin Ahmad Wasali [Sipitang] minta **PERDANA MENTERI** menyatakan keberkesanan program pendidikan dan kesedaran membanteras rasuah oleh Suruhanjaya Pencegahan Rasuah Malaysia (SPRM) terutama dalam kalangan generasi muda di negara ini.
49. PR-1343-L77478
Tuan Gooi Hsiao-Leung [Alor Setar] minta **PERDANA MENTERI** menyatakan berkaitan lawatan terbarunya ke China di mana pelbagai MOU bernilai RM143.64 bilion ditandatangani di antara Malaysia dan China, khususnya, apakah kesan MOU-MOU tersebut keatas kepentingan jangka masa lama ekonomi dan keselamatan negara kita.

[Pertanyaan di bawah PM.22(5)]

ATURAN URUSAN MESYUARAT DAN USUL-USUL

1. **Menyambung semula pertimbangan ke atas Rang Undang-undang Perbekalan 2017 (D.R.17/2016) dan Usul Anggaran Perbelanjaan Pembangunan 2017 seperti berikut:-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari empat puluh lapan bilion ringgit (RM48,000,000,000) dibelanjakan daripada Kumpulan Wang Pembangunan bagi tahun 2017, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2017, yang dibentangkan sebagai Kertas Perintah 25 Tahun 2016, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut.”

Dalam Jawatankuasa Sebuah-buah Majlis (10 November, 2016)

2. **Menteri di Jabatan Perdana Menteri akan mencadangkan :-**

“**BAHAWA** pada Selasa, 25 Oktober 2016 semasa sesi Kamar Khas, Yang Berhormat Lim Lip Eng, Ahli Parlimen Kawasan Segambut dengan biadapnya telah mempersoalkan kuasa Yang di-Pertua Dewan Rakyat yang boleh dikenakan ke atas beliau kerana enggan mengikut arahan Tuan Yang di-Pertua.

BAHAWA Yang Berhormat Segambut juga telah menghina Yang di-Pertua Dewan Rakyat dengan kenyataan “*You are a disgrace to Parliament.... we are elected and you are appointed*”. Kenyataan Yang Berhormat Segambut telah menghina Yang di-Pertua Dewan Rakyat dan Majlis Mesyuarat Dewan Rakyat yang telah memilih beliau sebagai Yang di-Pertua Dewan Rakyat berdasarkan Perkara 57 Fasal 1 Perlembagaan Persekutuan.

BAHAWA Yang Berhormat Segambut sebelum itu telah mengeluarkan satu kenyataan pada 23 Oktober 2016 yang mempertikaikan dan memperlekehkan keputusan Yang di-Pertua Dewan Rakyat berhubung dengan pertanyaan - pertanyaan serta usul yang berkaitan tindakan sivil *in rem* oleh Department of Justice mengenai isu *sub judice*.

BAHAWA Yang Berhormat Segambut juga telah mengeluarkan satu kenyataan semasa sidang media di lobi Parlimen pada Khamis, 7 April 2016 yang menyatakan bahawa Yang di-Pertua Dewan Rakyat gagal dalam usaha-usaha penambahbaikan Parlimen yang sedang dilaksanakan oleh Yang di-Pertua Dewan Rakyat dan meminta agar Yang di-Pertua Dewan Rakyat meletakkan jawatan.

DAN BAHAWA perbuatan dan kenyataan–kenyataan yang dibuat oleh Yang Berhormat Segambut itu adalah merupakan satu penghinaan kepada Tuan Yang di-Pertua Dewan Rakyat yang menjalankan tugas sebagai Pengerusi Dewan ini dan demikian bererti penghinaan juga kepada Dewan Rakyat yang turut mencemarkan nama baik dan prestij Dewan Rakyat.

MAKA INILAH DIPERSETUJUI BAHAWA Yang Berhormat Lim Lip Eng, Ahli Parlimen Kawasan Segambut hendaklah digantung daripada perkhidmatan Majlis Mesyuarat selama enam (6) bulan dari tarikh keputusan usul ini diluluskan.”

- | | | | |
|----|---------------|---|-----------------------------------|
| 3. | (D.R.18/2016) | Rang Undang-Undang Kewangan 2016 | Bacaan Kali
Yang Kedua |
| | | [Menteri Kewangan] | |
| 4. | (D.R.13/2016) | Rang Undang-Undang Mahkamah (Kaedah-Kaedah
Pemulaan Tindakan Sivil) 2016 | “ |
| | | [Menteri di Jabatan Perdana Menteri] | |
| 5. | (D.R.16/2016) | Rang Undang-Undang Pentadbiran Undang-undang
Islam (Wilayah-Wilayah Persekutuan) (Pindaan)
2016 | “ |
| | | [Menteri di Jabatan Perdana Menteri] | |
| 6. | (D.R.15/2016) | Rang Undang-Undang Pendaftaran Kelahiran dan
Kematian (Pindaan) 2016 | “ |
| | | [Menteri Dalam Negeri] | |

7. **Menteri Kewangan** akan mencadangkan :-

“Bahawa Dewan ini, mengikut peruntukan subperenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan), membuat pelaburan dengan menukarkan sebahagian pinjaman yang diberikan oleh Kerajaan Malaysia sebanyak RM500 juta kepada Small Medium Enterprise Development Bank Malaysia Berhad (SME Bank), sebuah syarikat yang dimiliki oleh Menteri Kewangan (Diperbadankan) kepada ekuiti bersamaan dengan Lima Ratus Juta (500,000,000) unit saham biasa pada RM1 bagi satu unit saham”.

8. **Menteri Dalam Negeri** akan mencadangkan :-

“Bahawa Majlis ini membuat suatu ketetapan menurut sub-seksyen 4(11), Akta Kesalahan Keselamatan (Langkah-langkah Khas) 2012 supaya sub-seksyen 4(5), Akta ini hendaklah terus berkuatkuasa bagi tempoh 5 tahun lagi mulai dari 31 Julai 2017”.

9. **Dato' Seri Abdul Hadi bin Awang [Marang]** akan mencadangkan :-

“Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:-

i. menggantikan Seksyen 2 dengan seksyen berikut:

“**2.** Mahkamah Syariah akan mempunyai kuasa ke atas seseorang penganut agama Islam dan di dalam hal-hal kesalahan di bawah perkara-perkara yang disenaraikan di dalam Butiran 1 Senarai Negeri di bawah Jadual Kesembilan Undang-Undang Persekutuan.”; dan

ii. memasukkan selepas seksyen 2 dengan seksyen berikut:

“**2A.** Dalam menjalankan undang-undang jenayah di bawah Seksyen 2 Mahkamah Syariah berhak menjatuhkan hukuman yang dibenarkan oleh undang-undang syariah berkaitan hal-hal kesalahan yang disenaraikan di bawah seksyen yang disebutkan diatas, selain dari hukuman mati.”

[Menteri di Jabatan Perdana Menteri]

10. PR-1343-U75583

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, kesan pemanasan global telah mencapai satu tahap yang amat serius di mana disebabkan peningkatan paras air laut, terdapat banyak sawah-sawah padi tidak lagi dapat ditanam dengan tanaman padi disebabkan sawah-sawah padi ini telah dicemari dengan air masin. Dan mengambil maklum juga bahawa kesan daripada fenomena ini, para petani terutama sekali mereka yang menanam padi di sawah-sawah padi yang berkedudukan tanah rendah atau pesisir pantai kehilangan punca pendapatan dan sekaligus kualiti hidup mereka turut terjejas. Dan mengambil maklum juga bahawa, sebagai langkah mitigasi bagi memulihkan ekonomi para petani ini, Kerajaan hendaklah membantu mereka dengan memperkenalkan tanaman bernilai komersial lain, yang sesuai ditanam di sawah yang dimasuki air masin tersebut seperti penanaman kelapa pandan dan sebagainya. Dan mengambil maklum juga bahawa penyediaan dan pengorekan perparitan untuk meninggikan paras tanah yang dimaksudkan di atas, di kawasan yang terlibat akan membolehkan kawasan yang terlibat tidak ditenggelami air masin. Maka, bagi menangani masalah ini, Dewan ini hendaklah mengambil ketetapan bahawa, di samping menangani isu pemanasan global secara serius, Kerajaan juga harus segera membantu para petani (atau pesawah padi) dalam mengusahakan semula sawah-sawah padi mereka yang terjejas oleh fenomena ini, dengan memperkenalkan tanaman bernilai komersial yang baru di tanah tersebut."

[Menteri Pertanian dan Industri Asas Tani]

11. PR-1343-U75584

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa dengan purata hujan tahunan negara kini telah meningkat sering kita dengar tentang keadaan banjir kilat yang telah banyak menyebabkan kemusnahan harta benda, ameniti sosial, kerosakan alam sekitar dan lain-lain yang menjangkau jutaan ringgit nilainya. Dan mengambil maklum juga bahawa keadaan banjir ini ditambah burukkan lagi di mana banyak kolam dan paya ditimbus bagi pembangunan hartanah dan sebagainya. Ini menyebabkan sungai-sungai dan terusan tidak lagi dapat menampung jumlah air yang mengalir secara mendadak. Dan mengambil maklum juga bahawa, sebagai langkah mitigasi, kolam-kolam air yang luas boleh diwujudkan dalam sesuatu kawasan bagi menampung air hujan lebat yang turun sebelum ianya mengalir ke sungai-sungai dan terusan, sekali gus dapat mengurangkan kejadian banjir kilat. Dan mengambil maklum juga bahawa, takungan air di kolam-kolam tadi boleh juga dirawat dan disalurkan ke empangan bekalan air yang mana boleh digunakan sebagai air terawat oleh para pengguna. Dan mengambil maklum juga bahawa air daripada takungan kolam itu juga boleh disalurkan kepada industri-industri yang memerlukannya di samping digunakan untuk menyiram tanaman atau taman-taman. Maka, bagi menangani masalah banjir kilat ini, dewan yang mulia ini hendaklah mengambil ketetapan bahawa Kerajaan hendaklah mensyaratkan bahawa sebelum sesuatu zon itu dibangunkan, satu kawasan kolam takungan air hendaklah disediakan bagi maksud di atas."

[Menteri Sumber Asli dan Alam Sekitar]

12. PR-1343-U75585

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, ramai graduan serta lulusan sekolah menengah tidak berpeluang untuk mendapatkan kerja dan kebanyakan mereka ini akhirnya hanya berlegar di kampung masing-masing dan tidak berpendapatan. Dan mengambil maklum juga bahawa, masih banyak peluang-peluang perniagaan yang boleh diusahakan di kampung-kampung sekiranya mereka yang berminat mendapat latihan, bimbingan dan bantuan kewangan yang secukupnya. Dan mengambil maklum juga bahawa pihak Kerajaan telah beberapa kali mengutarakan program pembangunan desa seperti program satu kampung satu industri, namun belum ada lagi program seumpamanya yang benar-benar berjaya. Dan mengambil maklum juga bahawa kebanyakan bekalan bahan mentah bagi penghasilan produk makanan, herba, tenusu dan lain-lain lagi boleh didapati di kampung-kampung dengan mudah. Dan mengambil maklum juga bahawa, melalui program "cottage industry" bukan sahaja penduduk kampung yang terlibat dalam program ini akan mendapat manfaat, malah negara secara keseluruhannya akan mendapat manfaat daripada aliran aktiviti ekonomi yang dijana. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan merumus satu mekanisme yang lebih efektif bagi menggalakkan penglibatan penduduk kampung dalam aktiviti "cottage industry" yang mana akan dapat membawa manfaat kepada 15-20 orang daripada setiap kampung."

[Menteri Kemajuan Luar Bandar dan Wilayah]

13. PR-1343-U75586

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa kos sara hidup keluarga telah meningkat dengan mendadak dan ini dapat dirasakan begitu hebat sekali oleh mereka daripada golongan berpendapatan rendah. Dan mengambil maklum juga bahawa teknologi solar yang terdapat pada hari ini dapat membekalkan tenaga elektrik dengan murah dan mesra alam. Dan mengambil maklum juga bahawa kadar penurunan hujan di negara ini agak tinggi dan boleh membekalkan bekalan air mentah yang cukup sekiranya ditadah dan disimpan dengan baik. Maka, bagi meringankan kos sara hidup keluarga terutama sekali mereka yang dari golongan berpendapatan rendah, Dewan yang mulia ini hendaklah mengambil ketetapan bahawa, semua pembinaan PPRT yang baru hendaklah dilengkapi dengan sistem tenaga solar dan tangki tadahan air bagi membolehkan pemilik rumah tersebut menurunkan sedikit kos sara hidup keluarga mereka."

[Menteri Kesejahteraan Bandar, Perumahan dan Kerajaan Tempatan]

14. PR-1343-U75587

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, terdapat desas-desus bahawa pencarum Kumpulan Wang Simpanan Pekerja (KWSP) yang masih menabung dalam KWSP, yang telah mencapai umur 75 tahun, yang dikatakan mencecah jumlah 260,000 orang, tidak lagi dibayar dividen ke atas simpanan mereka di dalam KWSP, seperti yang disiarkan oleh akhbar The Sun Daily. Dan mengambil maklum juga bahawa, kekeliruan ini adalah disebabkan oleh polisi KWSP yang dikeluarkan pada tahun 2008, melalui Akta KWSP 1991 yang menerangkan bahawa simpanan para pencarum yang telah mencapai umur 75 tidak akan dibayar dividen. Dan mengambil maklum juga bahawa para pesara yang masih menyimpan akaun dengan pihak KWSP masih memerlukan sumber pendapatan yang terurus dengan kadar pulangan yang baik dan KWSP dikatakan memberikan kadar pulangan yang baik serta terjamin selamat. Maka, bagi menangani masalah ini dan membela nasib para pendeposit KWSP yang dimaksudkan, Dewan yang mulia ini hendaklah mengambil ketetapan bahawa Kerajaan hendaklah segera meminda Akta 1991 dan membatalkan polisi KWSP 2008 bagi memastikan agar para pencarum atau penabung KWSP menerima dividen selagi mereka masih mempunyai akaun yang aktif dengan KWSP."

[Menteri Kewangan]

15. PR-1343-U75588

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, kos barangan dan kos sara hidup di negeri Sabah adalah antara yang tertinggi di negara ini dan polisi kabotaj, dikatakan sebagai antara penyebab utama keadaan ini berlaku. Dan mengambil maklum juga bahawa, akibat polisi kabotaj ini, kapal-kapal dagang dari luar negara tidak dibenar memunggah dan mengangkut barangan dari mana-mana pelabuhan di Malaysia kecuali di Pelabuhan Klang. Ini menyebabkan barangan tersebut terpaksa di angkut semula dengan kos tambahan ke pelabuhan-pelabuhan di negeri Sabah dan Sarawak. Dan mengambil maklum juga bahawa disebabkan polisi kabotaj ini, kadar caj penghantaran antara pelabuhan ditetapkan oleh pihak perkapalan dengan kawalan terhad oleh pihak Kerajaan. Misalnya, caj penghantaran kontena 20 kaki dari pelabuhan Klang ke pelabuhan Kota Kinabalu ialah RM2,436, ke pelabuhan Sandakan RM3,235 dan ke pelabuhan Tawau RM3,336. Ternyata caj ini adalah terlalu tinggi jika dikira dari segi jarak batu nautika antara pelabuhan berbanding dengan caj penghantaran di pelabuhan-pelabuhan lain. Maka, bagi menangani masalah ini serta mengimbangi harga barangan dan kos sara hidup di negeri Sabah, Dewan yang mulia ini hendaklah mengambil ketetapan bahawa Kerajaan hendaklah segera membatalkan polisi kabotaj ini bagi meringankan beban rakyat Sabah dan Sarawak khususnya."

[Menteri Kewangan]

16. PR-1343-U75589

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa kebanjiran warga asing ke negara ini telah membawa budaya yang kurang baik di negara ini di mana mereka dengan sewenang-wenangnya membuang sampah merata-rata dan ini dapat kita lihat di kota-kota besar pada hujung minggu di mana mereka ini keluar beriadah. Dan mengambil maklum juga bahawa, sejak akhir-akhir ini, penduduk tempatan juga telah mula dijangkiti dengan sikap kutu sampah yang dimaksudkan di atas, di mana penduduk tempatan juga mula membuang sampah merata-rata. Dan mengambil maklum juga bahawa penularan pelbagai jenis penyakit bawaan vektor, tikus, lipas dan lalat, pembuangan sampah merata-rata telah menambah-burukkan lagi ancaman kesihatan di negara ini. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah memindah undang-undang bagi menghukum kutu-kutu sampah dengan hukuman lebih berat lagi disamping menggalakkan lebih banyak usaha untuk kitar semula dijalankan."

[Menteri Kesejahteraan Bandar, Perumahan dan Kerajaan Tempatan]

17. PR-1343-U76223

Tuan Nga Kor Ming [Taiping] akan mencadangkan :-

"Bahawa Dewan yang mulia ini meluluskan satu ketetapan supaya Laporan Ketua Audit Negara berkenaan dengan isu 1 MDB (1 Malaysia Development Bhd) dibentang dan dikemukakan untuk perbahasan di Dewan Rakyat dengan kadar segera."

[Perdana Menteri]

18. PR-1343-U76225

Tuan Nga Kor Ming [Taiping] akan mencadangkan :-

"Bahawa Dewan yang mulia ini meluluskan satu ketetapan supaya YAB Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember."

[Perdana Menteri]

19. PR-1343-U76226

Tuan Nga Kor Ming [Taiping] akan mencadangkan :-

"Bahawa Dewan yang mulia ini meluluskan satu ketetapan supaya mengesyorkan kepada DYMM Seri Paduka Baginda Yang Di Pertuan Agong untuk menubuhkan satu Suruhanjaya Diraja supaya menyiasat dan mengemukakan laporan siasatan terhadap skandal kewangan 1MDB dengan kadar segera."

[Perdana Menteri]

20. PR-1343-U76228

Tuan Nga Kor Ming [Taiping] akan mencadangkan :-

"Bahawa Dewan yang mulia ini meluluskan satu ketetapan selaras dengan titah Majlis Raja-Raja Melayu dimana Akta Majlis Keselamatan Negara 2016 dibentang dan dikaji semula di Dewan Rakyat dengan kadar segera."

[Perdana Menteri]

21. PR-1343-U77356

Tuan M. Kulasegaran [Ipoh Barat] akan mencadangkan :-

"Bahawa Dewan ini mengambil maklum, Parlimen sepatutnya mengambil maklum kes penembakan Lucus a/l Asirvatham dari Ipoh semasa bekerja di kebunnya di Chemor Perak pada 11 Ogos 2016 oleh seorang bekas pegawai kanan polis. Kes penembakan tersebut perlu disiasat secara ketat dan efektif melalui penubuhan sebuah badan jawatankuasa yang bebas dan integriti serta laporannya diumumkan kepada orang ramai (made public)."

[Menteri Dalam Negeri]

22. PR-1343-U75910

Dr. Tan Seng Giaw [Kepong] akan mencadangkan :-

"Bahawa Dewan ini membahaskan langkah-langkah untuk mencegah pengganas di Malaysia."

[Menteri Dalam Negeri]

23. PR-1343-U75911

Dr. Tan Seng Giaw [Kepong] akan mencadangkan :-

"Bahawa Dewan ini memperbincangkan dasar penyelenggaraan semua jenis pengangkutan di negara".

[Menteri Pengangkutan]

24. PR-1343-U75794

Tuan Fong Kui Lun [Bukit Bintang] akan mencadangkan :-

"Bahawa Kerajaan mempergiatkan usaha untuk meyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 59 tahun lalu supaya mereka boleh hidup dengan aman dan saling memerlukan dan memahami antara satu sama lain bagi memudahkan mereka membangunkan ekonomi negara secara bersama dan merealisasikan impian Malaysia."

[Perdana Menteri]

25. PR-1343-U75795

Tuan Fong Kui Lun [Bukit Bintang] akan mencadangkan :-

"Bahawa Kerajaan memulihkan pilihan raya kerajaan tempatan seluruh negara supaya urustadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

[Menteri Kesejahteraan Bandar, Perumahan dan Kerajaan Tempatan]

26. PR-1343-U75707

Tuan Loke Siew Fook [Seremban] akan mencadangkan :-

"Bahawa Dewan ini merakamkan sekalung tahniah dan setinggi-tinggi penghargaan kepada wira dan wirawati negara yang telah mengharumkan nama negara di Sukan Paralimpik dan Olimpik 2016 di Rio De Janerio. Kejayaan Mohamad Ridzuan Mohamad Puzi acara 100 meter, Muhammad Ziyad Zolkefli acara lontar peluru dan Abdul Latif Romly acara lompat jauh merangkul tiga pingat emas pertama untuk Malaysia dalam Sukan Paralimpik serta dua rekod dunia yang dicapai oleh mereka adalah satu kejayaan yang luar biasa dan sangat dibanggakan. Atlet wanita Siti Noor Radiah Ismail yang memenangi pingat gangsa dalam acara lompat jauh di Sukan Paralimpik juga merupakan satu pencapaian yang membanggakan. Dewan ini juga merakamkan ucapan setinggi-tinggi tahniah terhadap atlet-atlet negara yang memenangi 4 pingat perak dan 1 pingat gangsa di Sukan Olimpik Rio 2016 iaitu pemenang pingat perak dalam acara badminton perseorangan lelaki Dato Lee Chong Wei, badminton beregu lelaki Goh V Shem-Tan Wee Kiong, badminton beregu campuran Chan Peng Soon-Goh Chan Ying dan pemenang pingat perak dalam acara terjun Pandelesa Rinong-Chan Jun Heong serta pemenang pingat gangsa acara berbasikal keirin Azizulhasni Awang. Atlet-atlet tersebut telah mencapai keputusan yang terbaik untuk kontijen Malaysia dalam sejarah penyertaan negara dalam Sukan Olimpik dan kejayaan tersebut harus dibanggakan oleh seluruh rakyat Malaysia."

[Menteri Belia dan Sukan]

27. PR-1343-U77348

Tuan Liew Chin Tong [Kluang] akan mencadangkan :-

"Bahawa Dewan ini bersetuju mengurangkan peruntukan untuk JPM dan menyalurkan kepada peruntukan bagi hal ehwal pendidikan, pengangkutan awam, kesihatan dan kebajikan rakyat. Peruntukan untuk Jabatan Perdana Menteri telah dihadkan tahapnya pada tahun 2008 iaitu masing-masing sebanyak RM3.4 bilion bagi peruntukan pengurusan dan RM3.5 bilion untuk pembangunan. Ini membawa kepada jumlah keseluruhan sebanyak RM6.9 bilion. Berbanding 2016, anggaran peruntukan pengurusan dan pembangunan telah melepasi tahap ditetapkan pada 2008 tersebut iaitu masing-masing sebanyak RM5.9 bilion dan RM14 bilion yang membawa kepada jumlah keseluruhan RM20 bilion."

[Menteri Kewangan]

28. PR-1343-U77349

Tuan Liew Chin Tong [Kluang] akan mencadangkan :-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi 100 juta oleh Kementerian Pertahanan, mesti dibawa ke Parlimen dibahas dan diaudit oleh Jabatan Audit Negara supaya untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara."

[Perdana Menteri]

29. PR-1343-U77437

Tuan Manivanan a/l Gowindasamy [Kapar] akan mencadangkan :-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

[Menteri Dalam Negeri]

30. PR-1343-U77438

Tuan Manivanan a/l Gowindasamy [Kapar] akan mencadangkan :-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga simati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

[Menteri Dalam Negeri]

31. PR-1343-U77439

Tuan Manivanan a/l Gowindasamy [Kapar] akan mencadangkan :-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]

32. **Tuan Gobind Singh Deo [Puchong]** akan mencadangkan:-

Pada 17.10.2016, Tuan Yang Di-Pertua telahpun membuat keputusan di dalam Dewan Rakyat seperti berikut:

Jadi masa tidak lagi mengizinkan. Jadi sesi pertanyaan-pertanyaan bagi jawapan lisan berakhir dan sebelum saya memanggil Setiausaha untuk beredar ke urusan mesyuarat yang lain, ada satu perkara mustahak yang ingin saya umumkan iaitu Ahli-ahli Yang Berhormat **saya mendapati beberapa soalan dalam pertanyaan jawapan lisan dan bertulis serta usul yang telah dikemukakan bagi Mesyuarat Ketiga Penggal Keempat Parlimen Ketiga Belas kali ini berkaitan dengan satu isu yang menjadi kegemaran ahli-ahli Yang Berhormat iaitu isu tindakan sivil in rem oleh Jabatan Keadilan Amerikat Syarikat atau singkat DOJ.**

Jadi untuk mengelakkan lagi satu pertuduhan seperti di sesi yang lalu iaitu di mana soalan yang perlu dijawab secara lisan oleh kerana tidak ada masa untuk dijawab pada ketika itu, maka Menteri menjawab mengatakan bahawa tidak payalah dijawab secara bertulis oleh kerana itu adalah *sub judice*.

Jadi dalam hal ini, dalam sesi ini juga ada perkara-perkara yang sedemikian. Jadi saya tidak mahu lagi timbul satu persepsi di mana Menteri akan dituduh bahawa dia *assumed the role of Speaker*. **Jadi untuk itu setelah meneliti isi kandungan pertanyaan-pertanyaan tersebut, saya mendapati bahawa ia adalah perkara yang masih dalam timbangan mahkamah ataupun sub judice. Oleh itu Menteri yang berkenaan tidak perlu jawab kepada perkara-perkara tersebut.**

Manakala kepada Ahli-ahli Yang Berhormat yang sedemikian untuk memuaskan hati mereka saya akan sampaikan setiap Ahli Yang Berhormat keputusan saya secara bertulis. Terima kasih. Sila.

Dengan hormatnya, saya usulkan supaya keputusan Tuan Yang Di-Pertua tersebut dikaji semula menurut Peraturan 43 Peraturan Majlis Mesyuarat di atas alasan-alasan berikut:

- (i) Peraturan yang menghalang pertanyaan oleh kerana sub judice tidak terpakai kepada kes-kes di luar Malaysia.

- (ii) Oleh yang demikian, tindakan *civil in rem* oleh Jabatan Keadilan Amerika Syarikat tidak boleh menjadi asas untuk penolakan soalan ataupun seseorang Menteri dikecualikan daripada menjawab soalan tersebut atas alasan perkara itu sub judis.
- (iii) Perkara ini dibincangkan dalam "Buku Erskine May's Treaties on The Law, Privileges, Proceeding's and Usage of Parliament 24th Edition 2011" di mana 365 dimukasurat disebut seperti berikut:

Matters sub judice

By a resolution of the House, cases in which proceedings are active in United Kingdom courts shall not be referred to in any motion, debate or question (see pp 396, 441-443); though the House has further resolved to give Chair some discretion to allow reference to be made to matters awaiting or under jurisdiction in all civil courts in certain specified circumstances, **provided that there is no real and substantial danger of prejudice to the proceedings.** The 'sub judice rule' as it is called, also applied to matters before a coroner's court or a Fatal Accident Inquiry. If the subject-matter of the question is found to be, or become, sub judice of the questions has been given, the Member is asked to withdraw it, or the Speaker may direct it to be removed from the notice paper or refuse to allow it to be asked if it is on the Order Paper.

The rule does not apply to matters which are sub judice in courts of law outside Great Britain and Northern Island, nor to matters which are the subject of administrative inquiry.

- (iv) jadi dengan segala hormatnya, jelas bahawa keputusan Tuan Speaker yang berasaskan kepada alasan sub judice adalah bertentangan dengan praktis yang diamalkan berkenaan isu itu dan oleh yang sedemikian boleh dan perlu dikaji semula.
2. Seterusnya dengan merujuk kembali lagi kepada petikan di dalam buku Erskine May di atas adalah jelas bahawa **sekiranya pun prosiding tersebut di dalam negara ini**, Tuan Speaker dalam memutuskan isu sama ada ataupun tidak perkara ini dihalang kerana sub judice perlu menilai sama ada wujud ataupun tidak "*real and substantial danger of prejudice*" kepada prosiding tersebut.
 - (i) Dengan segala hormatnya untuk menimbang dan seterusnya membuat keputusan berkenaan perkara itu, saya berpendapat bahawa Tuan Speaker perlu:
 - (a) memberikan Ahli-ahli Parlimen peluang untuk didengar sebelum membuat sebarang keputusan berkenaannya.
 - (b) menyakinkan diri dengan rujukan penuh kepada prosiding Mahkamah tersebut dan seterusnya menimbang kesan soalan-soalan yang ditanya kepada prosiding tersebut sebelum membuat keputusan tersebut.

- 2 (ii) Di dalam hal ini, saya memohon supaya Tuan Speaker menjelaskan sama ada ataupun tidak Tuan Speaker ada salinan dan sudah menimbang dengan mendalam semua kertas-kertas kuasa dalam prosiding DOJ tersebut (iaitu tuntutan dan jawapan-jawapan kepadanya sekiranya ada) untuk menyakinkan diri Tuan Speaker berkenaan fakta-fakta serta isu-isu yang berbangkit dalam perkara itu untuk membuat keputusan bahawa soalan-soalan itu adalah dihalang oleh perkara *sub judice*.

- 3 (i) seterusnya saya dengan segala hormatnya memohon rujuk kepada Peraturan 36(1) dan 23(1)(g) Peraturan Mesyuarat Dewan Rakyat di mana cukup jelas bahawa perkara yang perlu diputuskan adalah:

23(1)(g) A question shall not be so drafted as to be likely to prejudice a case under trial, or be asked to any matter **which is sub judice**; dan

36(2) Reference shall not be made to any matter which is sub judice in such a way might in the opinion of chair ***prejudice the interests of parties thereto***"

- 3 (ii) Dengan segala hormatnya, menurut Peraturan tersebut Tuan Speaker perlu untuk menentukan "parties" kepada tindakan ini dan kepentingan mereka sebelum keputusan berkenaan prejudis yang mungkin timbul seakibat soalan yang diajukan itu.

Tuan Speaker,

Negara kami dilanda krisis dan segi wujudnya satu perkara yang melibatkan wang yang sangat besar yang kini menjadi topik perbincangan hangat bukan sahaja di Malaysia tetapi di seluruh dunia.

Perkara ini telahpun menyebabkan tindakan yang tegas diambil oleh negara-negara seperti Singapura, United Kingdom dan Amerika Syarikat manakala di negara kita tiada sebarang tindakan berkesan diambil terhadap mana-mana pihak sama sekali sehingga sekarang.

Perkara ini telahpun menyebabkan banyak soalan ditanya oleh rakyat Malaysia khususnya berkenaan corak pentadbiran Kerajaan kami dan pengendalian siasatan perkara ini oleh jabatan-jabatan seperti Jabatan Peguam Negara, PDRM dan SPRM.

Isu ini sudah semestinya menjadi satu isu berkepentingan awam dan amat sangat perlu dibahaskan di dalam Dewan Rakyat.

Keputusan Tuan Speaker dengan segala hormatnya mempunyai kesan penghalang perkara ini daripada dibahaskan secara transparan dan juga memprejudiskan kesemua pihak dengan amat sangat oleh kerana mereka kehilangan peluang untuk menyoal dan menjelaskan semua keraguan yang timbul di dalam Dewan Rakyat yang mulia ini untuk pengetahuan rakyat Malaysia secara keseluruhannya.

Saya juga merayu kepada Tuan Speaker supaya melihat kepada “precedent” yang akan dicapai melalui keputusan ini di mana daripada sekarang, mudah sekali untuk sesiapa menghalang sesuatu perkara itu dibangkitkan di Dewan Rakyat iaitu dengan memfailkan atau merujuk kepada prosiding di luar negara untuk tujuan itu.

Ini kepada saya bukan niat ataupun matlamat yang ingin dicapai oleh Peraturan Mesyuarat yang digubal untuk “enhance” dan bukannya “restrict” dengan izin, perbincangan perkara-perkara penting untuk negara kita di dalam Dewan Rakyat yang mulia ini.

Maka saya selaku Ahli Parlimen Puchong merayu supaya usul saya dibenarkan dibahas dan keputusan Tuan Speaker itu, dikaji semula dan diketepikan dengan serta merta.

[Perdana Menteri]

33. Tuan Sim Chee Keong [Bukit Mertajam] akan mencadangkan :-

Pada 1 November 2016 (Ruj. YPDR.08/4/1/9(20)) Yang Berhormat Tuan Yang di-Pertua telah memberi maklumbalas secara bertulis kepada saya berhubung usul saya untuk merujuk Yang Amat Berhormat Ahli Parlimen Pekan kepada Jawatankuasa Hak dan Kebebasan seperti yang diperuntukkan oleh Perkara 36(12), Peraturan-peraturan Majlis Mesyuarat Dewan Rakyat (“Peraturan Mesyuarat”). Alasannya ialah, Ahli Pekan telah mengumumkan perkara dalam Ucapan Bajet beliau pada 21 OKTOBER 2016 yang sama ada tidak terkandung ataupun berbeza dengan apa yang termaktub dalam Kertas Perintah 25 Tahun 2016 iaitu Anggaran Perbelanjaan Persekutuan 2017 (“Anggaran tersebut”) seperti berikut:

“Setelah mengkaji dan mempertimbangkan usul Yang Berhormat berhubung dengan isu-isu yang dibangkitkan serta maklum balas yang dikemukakan, saya berpuas hati bahawa tiada kes prima facie wujud terhadap Yang Amat Berhormat Menteri Kewangan, Ahli Parlimen Kawasan Pekan. Ini adalah kerana Ucapan Bajet 2017 merupakan ucapan dasar yang melibatkan perancangan dan pelaksanaan projek/program Kerajaan bagi tahun kewangan yang akan datang. Sumber pembiayaan bagi pelaksanaan perancangan Kerajaan boleh ditanggung melalui Kumpulan Wang Disatukan, entiti seperti Badan Berkanun Persekutuan dan syarikat milik Kerajaan. Sekiranya pembiayaan adalah tidak daripada Kumpulan Wang Disatukan maka amaunnya tidak perlu dinyatakan dalam Anggaran Perbelanjaan Persekutuan yang dibentangkan.”

Saya, dengan rendah diri, ingin menyatakan bahawa saya tidak bersetuju dengan keputusan Yang Berhormat Tan Sri tersebut.

Justeru, saya ingin mengusulkan agar keputusan Yang Berhormat Tan Sri dikaji semula menurut Perkara 43 Peraturan Mesyuarat tersebut berasaskan sebab-sebab berikut:

- I. Jelas ada perkara yang disebut dalam Ucapan Bajet tetapi tidak terkandung dalam Anggaran tersebut – dan ini diakui sendiri oleh Menteri Kewangan 2, Yang Berhormat Ahli dari Titiwangsa, dalam ucapan beliau pada 07 NOVEMBER 2016.
- II. Jelas ada perkara yang disebut dalam Ucapan tersebut dan ada terkandung dalam Anggaran tersebut tetapi nilai yang diperuntukkan adalah jauh berbeza antara kedua-dua dokumen. Ini juga diakui sendiri oleh Menteri Kewangan 2 dalam ucapan beliau yang disebut di atas.
- III. Walaupun Menteri Kewangan 2 telah cuba menjawab pertuduhan tersebut, namun, jawapan beliau tidak memadai untuk menjelaskan bahawa Ucapan Bajet itu TIDAK mengelirukan Majlis. Sebaliknya, penerangan beliau menunjukkan bahawa Ucapan Bajet yang sarat dengan retorik politik kepartian tersebut, penuh dengan amalan Bajet tidak telus, tidak teratur dan tidak mudah ditelitikan. Amalan sedemikian seterusnya akan menghalang urusan Parlimen.
- IV. Penjelasan terhadap pertuduhan, jika ada, perlu dijawab sendiri oleh Ahli yang membuat ucapan tersebut dan bukan oleh orang lain sebab pihak yang dirujuk adalah individu yang spesifik.

Oleh itu, demi integriti Parlimen yang mulia ini, saya merayu agar Yang Berhormat Tan Sri boleh mengkaji semula keputusan Yang Berhormat Tan Sri serta membenarkan usul asal saya.

[Perdana Menteri]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN</u> <u>2016</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
DR.8	Laporan Jawatankuasa Kira-kira Wang Negara. - Projek Pengalihan Operasi Kereta Api Tanah Melayu Berhad Dari Tanjong Pagar ke Woodlands (Stesen), Singapura dan Kempas Baru (Depoh), Johor Bahru.	14 November 2016
ST.88	AKTA FI 1951 Perintah Fi (Agensi Angkasa Negara) 2016	14 November 2016
ST.90	Laporan Tahunan dan Penyata Kewangan Lembaga Pelesenan Kenderaan Perdagangan (LPKP) Sabah dan Sarawak Bagi Tahun 2015.	14 November 2016
ST.107	Laporan Tahunan dan Penyata Kewangan Lembaga Pembangunan Seni Visual Negara (LPSVN) Bagi Tahun 2015.	14 November 2016
ST.108	Laporan Tahunan dan Penyata Kewangan Akademi Seni Budaya dan Warisan Kebangsaan (ASWARA) Bagi Tahun 2015.	14 November 2016
ST.110	Laporan Tahunan dan Penyata Kewangan Lembaga Totalisator Malaysia Bagi Tahun 2015.	14 November 2016
ST.111	Laporan Tahunan dan Penyata Kewangan Lembaga Kemajuan Wilayah Pulau Pinang (PERDA) Bagi Tahun 2015.	14 November 2016
ST.124	Laporan Tahunan dan Penyata Kewangan Suruhanjaya Perkhidmatan Air Negara (SPAN) Bagi Tahun 2015.	14 November 2016
ST.125	Laporan Tahunan dan Penyata Kewangan Perbadanan Produktiviti Malaysia (MPC) Bagi Tahun 2015.	14 November 2016
ST.126	Laporan Tahunan dan Penyata Kewangan Lembaga Pembangunan Pelaburan Malaysia (MIDA) Bagi Tahun 2015.	14 November 2016

****UCAPAN
(PERATURAN MESYUARAT 17 BAHARU)
(KAMAR KHAS)**

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 14.11.2016 (Isnin)	1. YB Tuan Liew Chin Tong (Kluang)	1. Kilang Sawit Di Jementah/Kebun Bahru Dan Kilang Getah Di Buloh Kasap.	1. YB Menteri Sumber Asli Dan Alam Sekitar
2. 14.11.2016 (Isnin)	2. YB Tuan Stephen Wong Tien Fatt (Sandakan)	2. 39 Pekerja Tempatan Ditindas Oleh Dua Buah Syarikat Sekuriti Yang Dilantik Oleh Kementerian Pendidikan.	2. YB Menteri Pendidikan

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**